

JAUNAREN BIZTUERAKO PAZKO-DOMEKEA

SARRERAKO OHARKIZUNA

Pazko jai handi honetan, egun on!

Kristo biztu da. Aleluia! Egun santua da guztiontzat, gure jairik handiena dogu Pazko eguna.

Bart, gaueko eleizkizunean, barri pozgarri hau emon jakun: *"Zuek bilatzen dozuen Jesus biztu egin da! Ez dago hilobian"*. Eleizeak orain bi mila urte jaso eta harrezkero urtero ospatu dauan barri on pozgarri honek batu gaitu altara inguru honetara. Prestau daiguzan gure gogo-bihotzak urteko eukaristiarik nagusienean parte hartzeko.

BIZTU DA JAUNA EGIAZ: ALELUIA!

Zatoze pozik Jaunagana.

Gora ta gora Hari kanta.

Jauna da Jainko,

Jauna da Jainko bere gaitu

Harek gu egin ta eratu.

BATZARRA UR BEDEINKATUAZ TXIPRIZTINTZEA

Atzo gauean bedeinkatutako uraz txipriztinduko gaitu orain abadeak. Ur honek pekatuen parkamenerako emon jakun Batea gogoratuko deusku eta orduan hartutako grazia barriztauko dau gudan.

(Ur bedeinkatuaz txipriztindu)

Jaungoiko ahalguztidunak garbitu gaizala pekatutik eta, Eukaristia honen bidez,

bere erreinuko mahaian jarteko gai egin gagizala. Amen.

Abestia: Hartuko dogu ura pozik osasunaren iturritik

AINTZA ZERUETAN

Jauna biztu dalako pozez gainezka, kantau daigun gure Jaungoikoaren aintza.

HITZAREN LITURGIA

Ap Eg 10, 34a. 37-43:

Pazkoaldi osoan zehar, lehenengo irakurgaia *Apostoluen Eginak* deitzen dan liburutik hartzen da. Apostoluen esana gure fedearen oinarria da. Euren antzera, izan gaitezan geu ere Kristo biztuaren testigu.

Erantzun-Salmoa: 117. Salmoa

Poztasunez beterik bat egin daigun salmisteagaz gure eskerrona adieraziaz

*"Hau eguna hau Jaunak egina,
gure poza ta gure atsegina."*

Eskerrak Jaunari, ona da-eta,
haren maitasuna betikoa da-eta.
Esan begie israeldarrek:
haren maitasuna betikoa. R/.

«Jaunaren eskumak indarrez jokatu dau,
Jaunaren eskuma guztiz garaia da».
Ez naz hilko, ez, bizi baino,
Jaunaren egintzak kontatzeko. R/.

Etzegileek baztertutako harria
giltzarri bihurtu da.
Jaunak egin dau hori,
gure begien harrigarri. R/.

Kol 3, 1-4:

San Pauloren bizitza guztia Kristo bizi dala iragartea izan zan. Bateatuta gagozanok, Jesusen biztueratik bizi gara eta ezin geintekenez bizi izan edozelan, Jesusen erara baino.

Jn 20, 1-9:

Prestau gaitezan Ebanjelioa entzuteko: Jesusen biztuerea iragarriko deusku. Goratu dagigun Jauna, "*Aleluia*"-ren kantu

alaiaz.

SINISMENA AUTORTZEA

Gure sinismenaren oinarria Kristo berbiztua da. Eleiza osoagaz batera, autortu daigun guztiok alkartzen gaituan fede hori.

JAINKO HERRIAREN OTOITZA

Senideok: hilen artetik biztu dana geure artean dago. Bera bitarteko dogula, aurkeztu deioguzan gure eskariak Jaungoiko Aitari:

—Eleizearen alde: askatasun guztiaz, mundu osoan zehar, iragarri dagiala Jesusen biztuerearen barri pozgarria. Egin daigun otoitz.

—Itxaropentsu bizi dogun une honetan, bake zuzen eta iragankorra izan daigula eta gu guztiok bake-egileak izan gaitzela eguneroko bizitzan. Egin daigun otoitz.

—Gaixoen alde, minez bizi diranen alde, baztertuta eta zapalduta sentitzen diranen alde: euren nahigabea eta ezina, poz eta itxaropen bihurtu daitezala. Egin daigun otoitz.

—Eukaristia hau ospatzeko alkartu garean guztion alde, gure etxeko eta lagunen alde: pazko pozak bete gaizala eta geure bizitzeaz agertu daigula Jesus berbiztuagan sinistek merezi dauala. Egin daigun otoitz.

Aita ona, isuri Eleizearen eta mundu osoaren gainera zeure bedeinkapen ugaria. Jesukristo gure Jaun berbiztuaren bitartez. Amen.

PREFAZIOA

Beti emon behar deusaguz eskerrak Jaungoiko Aitari; baina, gaur, aparteko eran: Jesusek heriotzea garaitu daualako eta amaibako bizitzearen bidea zabaltu deuskulako.

JAUNARTZEAN

R/. Biztu da Kristo, Aleluia. Guregan dago, Aleluia.

—Jainkoak dau-ta gaur Kristo biztu: Aleluia!

Bere indarrez biztuko gaitu: Aleluia, Aleluia. R/.

—Gure gorputza dau-ta egoitza: Aleluia!

Orain berekin gaitu bat egin: Aleluia, Aleluia. R/.

—Jaunari kanta, goresmen eman: Aleluia!

bai bihotz eta bai gorputzean; Aleluia, Aleluia. R/.

AZKEN AGURRA

Senideok: Pazko Jaiei hasierea emon deutsegu; berrogeitamar egunez luzatuko ditugu Pazko Jaioak, Jesusen biztuera eta geure biztuerea ospatuz. Eleizatik urten aurretik, jaso dagigun Pazko eguneko **Bedeinkapen Nagusia**.

BEDEINKAPENA

- Bere Semearen biztueraz haren seme-alaba egin gaituen Jainkoak poztu eta bedeinkatu zagiezala. R/. Amen.

- Zuon sinismena autortuz, bataioan Kristorekin biztu zareenok, orain zintzo bizi izanez Bere lekuko izatera bialduak lortu dagizuela harekin bat egitea. R/. Amen.

+ Bedeinkatu eta gorde gaizala Jainko ahalguztidunak:
Aitak eta Semeak eta Espiritu Santuak. R/. Amen.

ZERU-LURREN ERREGINA: aleluia!, aleluia!

Biztu jaku Jesus Jauna: Aleluia!

—Zuregandik sortu dana: Aleluia.

Hilobitik biztu da-ta: Aleluia!

—Otoitz zure Semeari: Aleluia!

bizia deigun danori: Aleluia!